

閩中荔支通譜

閩中荔支通譜卷八

晉安鄧慶棠道協輯

綏城吳師古啓信訂

明徐興公荔支譜七

荔支詠小引

譜旣成矣、異名奇品片語單詞皆所必錄、筆札之暇、取品目之佳者、各賦一詩、得如干首、附于卷後、殫其伎倆、未足擬諸形容、空貽貂續之譏、不無弩末之愧、萬曆丁酉七月旣望、徐爌興公

識

江家綠

芳樹離離徧海涯由來香味壓三巴  
火雲映出玻瓈綠舊說閩中第一家

葡萄穗

絕豔濃香滿路飛玉膚輕襯紫羅衣  
若逢漢代乘槎使不帶涼州馬乳歸

雙髻

千年枝上並頭春斜結香雲縷縷新  
相倚明妝

誰得似黃陵廟裏兩夫人○

真珠

孕出靈胎箇箇圓。林中遙見夜光懸。一枝臨水  
低相向。不異鮫人泣月年。

十八娘

先朝舊事說閩王。公主曾稱十八娘。千載芳魂  
應化碧。佳名猶自記紅香。

將軍

林外森森翠幄高。軍中不用醉葡萄。只○今○十○里○

雲如錦疑是當年舊戰袍

釵頭

雙雙珠顆錦如霞斜插金釵貼鬢鴟一種人間  
可憐色六宮羞殺步搖花

粉紅

深紅輕膩壓枝斜貌比桃花更染霞一自承恩  
天寶後溫泉宮裏洗鉛華

綠羅袍

輕盈初試越羅新不染人間紫陌塵百萬紅妝

誰堪並婉孌江濱大小妃

宋家香

綠鬢如雲面似霞  
冰肌何用闕鉛華  
隔牆一道薰風煖  
吹得餘香過宋家

進貢子

丹荔何年貢七閩  
宣和中使往來頻  
玉環只識涪江種  
空走驪山一騎塵

延壽紅

九轉丹砂貯絳囊  
剖開甘液勝瓊漿  
由來此物

能延壽恨殺唐光誤漢皇

百步香

紫翠陰森映夕陽遙看一片錦雲鄉美人羅襪  
凌波過踏碎紅塵滿路香

綠紗

芊羅溪水綠如油浣出輕紗翠欲流何代美人  
工剪綵結成佳果綴枝頭

麝囊紅

累累丹實似星懸萬綠陰中赤欲然日午餘芬

生鼻觀不緣林下麝香眠

中秋綠

金風玉露仲秋時碩果枝頭落較遲  
明月一輪流翠影青銅高照碧琉璃

松紅

莫以松枝比荔枝翠濤聲裏露胭脂  
忽看琥珀生連理不待千年長兔絲

丁香

紅粉佳人獨倚樓雨中丹實滿枝頭  
荔香元與



丁香異只結團圓不結愁

郎官紅

甘液濃香似醪醕傳來佳種近楓亭誰將天上  
郎官宿散作林中萬點星

紅繡鞋

一片紅香落翠苔美人林下踏青回當年若使  
潘妃見貼地蓮花不敢開

綠珠

山禽偷取踏枝翻錯落珍珠綠滿園臥地殘香

吹不起月明如照墜樓覓

洞中紅

烏石山前暮雨涼幾番風起散餘香洞中六月  
紅如錦不但桃花誤阮郎

冰團

六月閩天見鬱蒸忽驚寒氣座間疑水晶盤貯  
深紅色白玉壺中映絳冰

何家紅

炎夏深林雨氣收胭脂片片落梢頭何郎粉向

朱衣拭滿面桃花汗欲流

鵲卵

月明銀漢鵲驚枝風動寒巢欲半欹吹落人間  
完似卵冰盤高累不愁危

勝江萍

纍纍枝上火雲燒甘液真同絳雪消一片紅光  
如日赤兒童空有楚江謠

綠核

滿林丹實夏煌煌一道炎風列燧光壯士緋袍

都解却碧苔齊臥綠沉槍

火山

迴望蒼梧是故鄉紫綃輕颺麥風涼生來自信  
紅顏薄歌向朱明闔艷妝

興公譜成於萬曆丁酉賦詩四十首色香味  
品摹寫殆盡予近增脩復得雜咏如千篇體  
雖不一要皆爲南中珍果標奇錄附其後亦  
吾鄉一段佳話也崇禎戊辰鄧慶棠識

五月十月初食火山荔枝

徐勣

仲夏氣鬱蒸輕紅綴荔子厥種名火山早熟差  
足喜色香雖未全驟食亦清美不患甘傷脾且  
愛冷沁齒已勝食來禽猶堪敵青李聊爾爲先  
鋒次第飽陳紫欲結林下盟請從今日始

小園荔子垂熟山鼠竊食殆半作詩以惡  
之

楓亭產奇品核小與衆殊吾宗狀頭老樹藝雄  
閩都小圃有閒地移植連根株經年十數載結  
實懸虬珠半披綠暈恰半着紅羅襦累累綴林

杪粲然同美姝造物頗忌盛香味招饑黷點捷  
偵緣樹竊食過獺狙日夜費防逐畢竟分甘腴  
詩人諄無用鼠輩胡爲乎鄰家富倉廩米粟難  
貯儲李斯昔有訓願爾移斯須

十二日食火山荔支同用王梅溪韻

朝聚首餐荔支狂來五字哦新詩今辰翠籠  
又擎到別有一種尤珍奇根株藝植同一土易  
熟離離滿園圃本支已識分廣南不待按圖翻  
舊譜異名嘉實雖滿山定讓此品來爭先嘗新

既喜早一月冰盤擘啖流饒涎乍食無多腹不  
果三百青銅沽百顆相期同到鳳皇岡天柱梢  
頭赤如火

再次王梅溪前韻

日長竹枕頭懶支飽食細誦龜齡詩四百年中  
幾人和句法難比前賢奇粵南有種到閩土栽  
種得宜推老圃笑殺永嘉韓彥直如許木奴亦  
作譜竊幸閒身居故山得食豈必論後先吾儕  
愛嗜同沆瀣俗輩忌食寧流涎今年結盟訂已

果更賽瓊丸閩珠顆陳紅江綠熟尚遲莫笑饒  
夫急如火

馬季聲西禪荔子生蠹簡來戲荅次韻

荔子濃香送晚風忽聞將熟半生蟲縱然聲價  
因微損猶勝驪山一騎紅

朱實輕吹小暑風誰知葉底飽秋蟲君家異品  
元稱綠莫惜西禪幾樹紅

十七日同伯孺在杭集鄧道協新居食中

冠荔支



新居初落成荔子熟已半梢頭覓早紅。正品得  
中冠摘來悅我口彷彿明星爛始食味尚酸澁  
背有微汗小者猶若珠大者尚如彈嘗新頗不  
厭錦殼堆几案輕風送晚涼清香迴鼻觀置埃  
無飛塵不作蘇子嘆

十九日積芳亭食早紅分得藥名體

驕陽起石林古木香早荔枝上風獨搖天南星  
已墜夏五味始全陳紫蘇病肺數百合飽嘗白  
石脂色膩自笑徐長卿尊前胡不醉

廿一日集高景倩木山齋食中冠伯孺作  
水墨荔支圖各賦

萬顆纍纍日飽嘗一枝偏帶墨痕蒼生來自有  
丹砂色寫出還疑黑葉香乍洗臙脂嬌翠袖新  
添螺黛變紅妝冰肌絕類崑崙女不是王家十  
八娘

廿九日高景倩齋中食鑛玉荔子賦得漢  
人名詩

江陳萬年種夏景丹顆垂檀藥布鑛玉香甘始

當時千枚乘露摘盆子盛鼎鼎諦審食其實核  
焦延壽宜楊盧植太酢青李尋傷頤綺疏受殘  
照林高相蔽虧盤桓譚轉劇三伏湛涼颶

五月晦日芝山寺避暑本宗上人以瓜荔

作供同賦十韻

寶刹芝山勝雲堂避鬱蒸探幽期野客結夏約  
名僧荔斷全林買瓜尋故事徵綠沈開古色丹  
實剝清冰甘比醍醐灌寒如沆瀣凝飄分消絳  
雪殼解裂紅縉七寶蓮還讓三生果莫矜梅檀

香豈匹酥酪味難勝  
斐几閒堪隱繩牀倦可憑  
清涼元足戀同坐佛前燈

六月三日集諸子九仙觀避暑食荔分得

回文

東城古樹遠蒼蒼  
目極雲天夏氣涼  
風捲翠濤松瀉響  
日薰丹顆荔生香  
通靈有夢仙遺蹟  
共樂行吟客繞廊  
空盡俗緣閒結社  
朧朧月影度疎篁

四日鏡瀾閣食桂林

結夏過高齋乘涼與客偕會尋扶荔勝品得桂林佳白傳圖珠顆閩娘落繡鞋閒來徵舊事半可續齊諧

六月六日集鼇峯玉真院限韻

松風謾謾亂吹衣山上臺高暑氣微古樹蟬衝殘靄咽遠林鴉背夕陽歸竹流翠影諸賢集荔剝紅塵一騎飛郭外澄江清似練幾人詩句比玄暉

初七日過在杭積芳亭適伯孺送方山滿

林香至分得鐘字

漬芳亭外將斜春科頭箕踞當長松敲門僂僂  
來老農一肩翠籠遙函封蓋頭新葉青茸茸此  
種產自五虎峰纍纍千顆香氣濃剖開瓊液涼  
心胸桂林鑛玉并金鐘夙稱異品今凡庸嬌如  
窺簾少女容黃衣綠裏光重重微風披拂林杪  
衝隔牆悞殺尋花蜂雄鷲勇噉皆可供鼓腹不  
用管朝饗

初九日蓮花樓食荔分得短歌行

冶城東望雄高閣萬疊烟巒青繞郭一時賓從  
集如雲勝會千秋繼河朔芙蓉出水搖朱闌古  
塘風裂紅衣殘城中城外遠騁目八窓吹送松  
濤寒主人爲具供丹荔翠籠遙從鳳岡至一道  
清芬縹緲飛水邊荷芰無香氣劇飲狂歌日正  
長始知世界元清涼世人擾擾居火宅更誰避  
得塵埃黃企脚南窓兼散髮如意擊將壺口缺  
相期爲樂樂未央回首東山吐明月

馬季聲自嶺南歸病起招集噉荔用韻

薰風長日值朱明不惜青蚨買側生千樹紅雲  
重設宴一尊白社又尋盟未須匱裏探金七且  
向盤中弄水晶香色已知勝百粵與君曾作嶺  
南行

謝在杭買莆田陳家紫一日夜直抵會城  
同諸子集積芳亭分得送字

余嘗著荔譜陳紫盛在宋異品冠莆陽古昔脩  
苞貢厥產因地佳別土不宜種聞名未見實往  
往勞魂夢主人好事者遠致役飛輶驛程三百



里日夜紅塵動筠籠乍入門香風瞥然送奇物  
匪獨餐拆東召賓從冰盤浸石泉嘗鮮客來共  
千顆虬珠拋一丸瓊液凍爽口恣吞咽入掌任  
娛弄宋香遠避舍江綠稱伯仲飽噉俱膨脝誰  
人腹空洞蔡譜互翻閱曾錄各諷誦豪飲招高  
陽竹葉啓銀甕持齋約名僧伊蒲設清供爲樂  
欣及時滿堂盡喧闐祇愛齒頰涼不患左車痛  
齋味無能名擬作陳紫頌

六月十四日過芝山寺噉荔支乘涼至夜

閒緣寧許自蹉跎古寺乘涼屢屢過已識荔支  
求價貴不妨榆莢數錢多幾竿脩竹通僧舍一  
抹殘陽掛女蘿選得樹陰同偃息臥看行蟻上  
南柯

十六日積芳亭噉黃香荔支

閩海從來說荔香誰知異品有深黃楚江寒菊  
初凝露蜀國秋葵乍向陽玉貌隔簾窺賈女金  
丸滿地撒韓郎洞庭莫詫柑三寸瓊液空含顆  
顆霜

十七日饋在杭雙髻荔支同咏

連理枝頭並蒂殷  
學胎合浦蚌珠還  
月明漢水雙妃佩  
花落天台二女鬟  
玉臂相聯嬌艷態  
香肩齊擲閨朱顏  
新承秦號夫人寵  
妬殺華清舊阿環

爲玉峰上人題伯孺水墨荔支

長日僧寮獨坐時  
刻藤如繭墨淋漓  
相看不說三生果  
但對南風寫荔支

六月廿三日謝在杭招集積芳亭食勝齋

荔支分得減字木蘭花二闕

和蘇長公

吳航異品、賜浴金盆、冰骨冷、紫袷羅襦、絕色輕盈、未易圖、忠州白傅、枉把朱顏、描竹素、沛國崇龜、益浪揮毫、寫玉肌、

又

紅繒如繭、紙上容華、應較淺、玉液金莖、香味從來、畫不成、梢頭懸火、日啖何妨、三百顆、十八娘紅、始信丹青、妬入宮、

賦得一騎紅塵妃子笑

劍閣巉岏繡嶺遙烟塵飛撲馬蹄驕香生荔子  
冰肌滑喜入芙蓉玉壓嬌檀口半遮依錦障瓠  
犀微動映紅綃漁陽鼓震明駝急春雨梨花怨  
未消

七月二日蔣子才齋中荔會分得宿名

華堂張宴秋宵永楊柳枝疎桐瘦影羣賢畢至  
良會頻愛客陳遵轄投井彈棋角勝聲喧闋濁  
醪一斗沾十千二參不醉履舄錯銀河炯炯明  
星懸虛窓露冷消煩暑荔香猶擘王家女赤實

還同魚尾頰芙蓉實蓮房愧儔伍蝸牛吐沫沿花  
叢燕子翼乾巢欲空已聞蟋蟀響居壁科頭箕  
踞乘涼風危絃三弄清商引出水癡龍吟玉軫  
須臾滿室煙雲飛心樂寧辭長夜飲

七夕積芳亭啖七夕紅荔支

乞巧爭陳荔子鮮紅繒羅列小樓前試看今夜  
支機錦半在人間半在天

愛殺風流十八娘一枝濃艷闌紅妝離離已見  
繁星墜不待天邊望七襄

食鵲卵荔支

乾鵲填橋碧漢邊  
栗林遺卵綴蒼烟  
絳苞抱出星同燦  
玉乳探來石共圓  
風動危巢驚彈過  
月明高樹儼珠聯  
莫言三匝無枝繞  
孕得靈胎木杪懸

咏荔支膜

曾向忠州畫裏描  
胭脂淡掃醉容消  
盈盈荷瓣風前落  
片片桃花雨後嬌  
白玉薄籠妖色映  
茜裙輕褱暗香飄  
嫣紅狼籍誰收拾  
十八閨娘裂

紫綃

餉馬季聲勝書荔枝

暑退金氣消勝書最晚熟厥產自吳航丹實大  
盈掬色奪滿林香味比江家綠乘潮渡馬江筠  
籠來甚速聞君病乍瘳走餉滿一斛我披本草  
經此物甘無毒蠲渴更補髓何患餐果腹寄語  
文園翁金莖漫求服



閩中荔支通譜卷八

閩中荔支通譜卷九

溫陵黃居中明立訂

西湖何偉然仙臞校

明鄧道協荔支譜一

荔支譜小引

荔支一物種類實繁君謨摘辭簡古列品明備  
興公採集羣書爭奇扼勝合此二譜誠難贅言  
不揣末學輒爲蛇足者亦有說焉一以君謨墨  
本與印本之頗異也二以各郡聲稱之不一也

三以興公蒐採之未盡也四以詩家錫名之未  
安也五以嶺南品第之當定也六以古人比擬  
之實遠也七以畫手寫生之失真也輒抒所聞  
聊爲博笑其佐議未敢鍼徐砭蔡若集錄或可  
步王踵張云爾昔崇禎改元夏日鄧慶棠道協  
識

第一

忠惠以莆陽近產作郡福泉各距其家未盡百  
里督課稍嚴民實向化風流儒雅迥異羣倫元

夕則出教張燈端陽則與民競渡成俗寓偕樂  
之意予嘗再役泉州每渡萬安拜公遺像考公  
舊蹟思慕公之爲人而公之書法已妙唐室宋  
朝諸公自當歛手渡口兩碑韻高鋒正千秋不  
磨百世可師荔譜七章竟分虞手歐褚而下難  
與雁行惟寂與家主與生家與冢謬誤滋甚使  
後世而下尊金石乎信梨棗乎余嘗數爲訂正  
參考異同疑信相半公之舊蹟獨見此二刻記  
得友人林異卿見公手書劉氏墓碑久卧榛莽

大爲賞識乃手自印搨傳之海內獨荔譜傳摹  
漸失其真今安得初本而品題印證之庶幾不  
負忠惠作譜至意

第二

荔支雖各土宜尤在培塿余嘗新正三日往鳳  
岡見土人俱肩沃土堆積樹根地本以種植爲  
事故荔子獨甲諸處陳紫游紫本爲同生方紅  
周紅未甚區別將軍卽爲天柱野種實是椰鍾  
七夕何異中元黃玉原乎皺玉鼈卵鵲卵一物

異名火山海山仍是早熟因其速化第見微酸  
若稍待時不嫌早慧余嘗食得熟者未見作醋

### 第三

荔子原無用核種者皆用好枝刮去外皮以土  
包裹待生白根如毛再用土覆一過以臘月鋸  
下至春遂生新葉他木栽時皆去枝葉獨荔樹  
要留宿葉承露若葉去露稿則無生機余嘗六  
七月鋸荔支蘆新根方生無不存活最怕日曬  
必求稍陰涼處時時灌水方易生葉嘗在水西

嶺東黃氏見池塘植山枝一顆云係核種土人  
言山枝皆用核種無有鋸蘆者蘆字之義果木  
非核種者稱蘆蓋福州方言也余嘗以龍目作  
蘆今已生植又以梅樹裹蘆次年花實凡樹枝  
堅者皆可作蘆凡果核堅者方可爲種惟李無  
仁獨否古人以王戎賣李鑽核千古負冤李一  
名夫人者皮多帶粉故云今日核中無仁譌爲  
夫人李旣無仁何用鑽核也徐譜以荔支種不  
佳者以好本接之龍目有接法荔支恐無接法

第四

蜀都賦云旁挺龍目側生荔支側生對旁挺而言非荔支卽名側生也果爾則龍目當稱旁挺矣上林賦云荅逖離支儻以側生例則荅逖亦可稱荔支耶張子壽賦彼前志之或妄何側生之見疵杜子美詩側生野岸及江蒲劉彥冲詩幽株旁挺綠娑娑皆本蜀都賦語然非以側生名荔支旁挺名龍目也黃魯直辯蜀都賦云龍目惟閩粵有之太冲不自知其失則賦云旁挺



猶耳食耳荔子本正出爲果中之王牡丹爲花中之王柰何以側生辱之文人因襲借用似以側生爲荔子別名余欲爲荔加九錫故特訂其訛毋使後人復責坊州貢杜若也

### 第五

五嶺七閩鄰封比境風土旣近氣韻攸同荔子高下未能甲乙大抵此種爲美不特閩美而粵亦美此種爲下不特粵下而閩亦下從來宦遊二土者皆未悉其真味著本草圖經者謂北方

以荔爲名而蒂牢甚不可摘取乃以利斧剗砍其枝故名爲利枝此說不經不特不知物性又且不知物情余向客粵食之甚甘可比漳泉上品大抵五嶺過煖時多失候物亦宜然福州寒暖適中物自純美嶺南縱不得與延壽勝畫爭雄乃列蜀川之後實爲厚誣嘗從先子宦遊滇南見沐國餉丹荔數枚盛以金縷雕盤其酸不可入口大抵摘之太早正味未全卽福州佳種亦以早摘作酸豈皆生質之過耶

第六

古人有以盧橘比荔子又有以荔子比楊梅又有以香櫞爭勝又有以櫻桃並妍又有尊之太過以龍眼爲之奴古今人皆未真識荔支趣也凡物各具一種之妙安得倫比惟時當盧橘則盧橘美時當楊梅則楊梅美各以其候爭妍取憐四時成功何能殿最而欲升之於上夷之於下其亦果中罪人

第七

劉崇龜姻舊或干以財則不荅惟圖荔支則受  
古文載此一段余不知崇龜何故獨重斯圖至  
此豈未之見乎但荔支實難寫也余嘗見名手  
圖之無一生氣此實天然正色不易名狀畫家  
原有難易桃花荔支俱難描寫崇龜所好因以  
不易見珍耳每念中表陳伯孺寫生之妙未嘗  
出過圖寫于今已矣言之黯然

閩中荔支通譜卷九

閩中荔支通譜卷十

溫陵黃居中明立訂

綏城吳師古啓信校

明鄧道協荔支譜二

事實

上林賦荅逌離支張揖曰荅逌似李出蜀中離  
支出閩中荔字亦用欒字衛洪七間云蒲萄龍

目椰子荔支作此字

北戶法

韓文云荔子丹兮蕉黃

南越王尉佗獻高祖鯨魚荔支高祖報以蒲桃

錦四匹

西京雜說

杜詩云憶昔南海使奔騰貢荔支

舊南海獻龍眼荔支十里一置五里一候晝夜  
傳送奔騰阻險死者繼路和帝時臨武長汝南  
唐羌以縣接南海上書諫曰臣聞上不以滋味  
爲德下不以貢膳爲功故天子食太牢爲尊不  
以果實爲珍伏見交趾七郡獻生荔支龍眼等  
鳥驚風發南州土地惡蟲猛獸不絕於路至於

觸犯死亡之害死者不可復生來者猶可救也  
此二物升殿未必延年益壽帝於是下詔曰遠  
國珍羞本以薦奉宗廟苟有傷害豈是愛民之  
本其勅大官勿復受獻

謝承書

前譜已見今

錄全疎

唐天寶中取涪州荔支自子午谷路進入

蜀志

敘州府土人善爲荔支煎可以致遠

白居易爲忠州刺史作木蓮荔支圖寄朝中親  
友各記其狀



荔支至難長二十四五年乃實坡詩云荔實周  
天兩歲星

荔支熟時人未採則百蟲不敢近人才採之烏  
鳥蝙蝠之類無不殘傷故採荔支者日中而衆  
採之

本草

福州志荔支樹高二三丈許大至合抱類類桂  
木冬青之屬四時榮茂不彫花似木犀青白色  
微香實初青漸紅肉淡白如脂玉性畏高寒州  
北數縣皆不可種連江之南雖植成熟亦晚直

至北嶺而南始大蕃盛其品不一

梁克家三山

志

魏文帝詔羣臣曰南方有龍眼荔枝寧比西國  
蒲萄石蜜乎今以荔枝賜將吏啖之則知其味  
薄矣

吳錄曰蒼梧多荔枝生山中人家亦有種之  
異物志曰荔枝爲異多汁味甘絕口又小酸所  
以成其味可飽食不可使厭生時大如雞子其  
膚光澤皮中食乾則蕉小則肌核不如生時四

月始熟也

仲長統昌言今人主不思神芝朱草而患枇杷  
荔支之腐亦鄙甚矣

劉涓子吳郡注曰荔支樹生山中葉綠色實正赤  
肉肥肌正白味美

以上五則出太平御覽

莆田方慎從字惟之宋景德二年進士守嘉州  
手植荔支于郡圃賦詩有留取清陰待子孫之  
句至大觀中曾孫偕以殿中侍御史持節按蜀  
部學嘉父老擁車誦慎從詩爲賀前言若荔亦

一奇也

興化府志

諸品見前二譜者不更錄惟舊志載一品紅於  
荔支爲極品六月熟今取以充貢星毬紅蒂根  
於臍銳者如瓜扁者如橘圓者如雞子願者如  
皂筴形殊狀詭核皆如丁香亦有絕無者食之  
甘脆而有韻蓋神品也磨盤雞引子皆七月熟  
扇畫實如饅頭皮薄上大下小味甘淨江甌實  
亦如饅頭皮光上大下小

通志

興化諸品已載蔡譜舊志謂譜中所志今不復

有惟玉堂紅出蔡宅狀元紅出風亭特珍於時  
按狀元紅舊名延壽紅狀元徐鐸所植也今延  
壽紅晚出種類迥殊而霞村所植者幾與風亭  
埒又黃石青山下謝姓園中一株獨大蓋百年  
物也每歲分枝而生熟時非先祭告不敢輕摘  
蓋若有神物爲之呵護者又有一種曰火山五  
月初間熟出黃巷者佳

郡志

玉堂紅爲莆之絕品其樹在城南蔡宅僅一株  
耳延壽紅品不減玉堂紅亦惟一株在延壽橋

側通志

皺玉梅聖俞詩云莆陽荔子乾皺壳紅釘密合

瑩事類

王十朋謝林處奪先紅詩云莆中荔子勝閩中  
烏石山前又不同正向鈴齋想風味奪先人送  
奪先紅蓋林居烏石嘗爲別院第一人故王及  
之

梅溪集

李贇皇謂此樹爲南方佳人不耐寒今郡西北  
七十里有邑曰興化其地稍寒已不可植矣

紹

熙志

元絳厚之不喜處外及以給事中領長樂親舊  
祖道東門勉以東閩舊府百貨所聚永嘉之柑  
烏石荔子珍絕天下絳下車作詩謝之云丹荔  
黃柑北苑茶勞君誘我向天涯爭如太液池邊  
看池北池南總是花

名賢清話

按烏石荔子舊傳宋香是也實如陳紫而小或  
云陳紫種出宋氏黃巢兵過欲斧之以王媪抱  
樹號泣而止後結實核若有斧痕

郡志

泉州志荔支五月熟者爲火山肉薄味酸六月  
熟者早紅桂林金鍾白密狀元紅之類皆佳品  
也七月熟者俱山荔支品類數十殼粗厚佳者  
良有風韻山縣霜多不宜

郡志

舊志云藍家紅其品爲郡第一法石白出法石  
院色青白大次藍家紅大將軍宋葉廷珪嘗植  
諸品於圃王十朋第之以此爲冠詩云別有深  
紅霸園圃郡中呼作大將軍七夕紅十朋詩云  
宅堂荔子無名字自我呼爲七夕紅桂林俗呼



野種金鍾楊師姑此品俱多稊核已上三品今  
所稱者

通志

漳州志何家紅樹在郡人何氏家故名見蔡襄  
荔支譜及曾鞏荔支錄火山本出廣南四月熟  
味甘酸而肉薄郡所產者絕勝中半五月熟其  
品亦佳陳家虎皮斑瓢厚核如丁香味美而香  
郡人品題以爲第一陳紅水團大綠小綠余家  
綠俱名品也

通志

廣州信安縣有連理荔支樹卽傍挺龍目側生

荔支也

寰宇記

果實之珍者樹有荔支

華陽園志

蔡翰林譜荔支以宋家香爲上品至和丙申宋氏老以餉公公謝以詩有並賞昔聞思故友之句注云嘗同陳太監靖方諫議謹言大卿階並曾曾賞建炎丁未六月師仁居里中有以百顆遺予者并墨公詩相示蓋去公時又七十有二年矣香味絕世尚如公言嗚呼向非王氏媼保持之豈使後生見此高韻耶

徐師仁

蔡公詩云荔枝纔似小青梅蓋四月初作也四月時未有荔枝所謂似小青梅者乃一種蚤荔名火山亦有佳品熟以五月間人不以爲貴也

劉克莊後村集

地氣莫暖於東南若福南四郡地居東南偏飛霜所不灑故生荔枝水口離郡城稍西北僅兩程許荔枝絕種矣

王敬美閩部疏

泉州城大而土曠人家多依原隰爲園林余以六月行部肩輿過其下嘉瓜四垂朱槿熠熠綠

柚扶搖於短垣丹荔點綴於碧葉真令人目不

暇給

閩部疏

漳州氣候最煖草木皆先時華余以四月抵郡  
解中盛有所植盤飢間頗不乏味叢蘭桂子茉莉  
薝蔔一時並開荔子蕉黃同案而薦誠寰中  
異境也

閩部疏

東坡嘗謂荔支厚味高格兩絕果中無比惟江  
緬柱河豚魚近之耳

穎濱詩云名園競摘絳紗苞蜜漬瓊膚甘且滑

壯遊京洛墮紅塵箬籠白曬脯最珍

合璧事類

閩越人高荔子而下龍眼吾爲評之荔子如食  
蝟蟬大蟬斫雪流膏一噉可飽龍眼如食彭越  
石蠪嚼嚙久之了無所得然酒闌口爽饜飽之  
餘則啞啄之味石蠪有時勝蝟蟬也戲書此紙  
爲飲流一笑

食荔多則醉以壳浸水飲之則解荔皮不可燒

其香引屍蟲

徐象梅博物彙編

萬曆己未呂祖降陳上舍來青閣每示此詩與

學士倡和其詠荔紅三章曰醉眼看來剖隋珠  
玉潤冰清白露腴新衣裁剪紅羅綵堪列丹砂  
上天厨一自幼生來雨露沾曾似繁星朵朵黏  
試把閩蜀並爲較始知味列有酸甜二枝頭紅  
顚樹欲然脫下絳衣美女眠津香恰似瓊花露  
生垂一本各團團三又五言一絕曰非酒亦能  
醉非肉亦能飽細微能迷人乃知造化巧呂祖  
靈蹟上舍名鍾彥溫陵人辛酉舉京兆試

呂祖所相也

南裔志曰龍眼荔支出朱提南廣縣犍爲棘道  
縣隨江東至巴郡江州縣往往有荔支樹高五  
六丈常以夏生其實赤可食龍眼似荔支其實  
亦可食

方輿云學士山在石照縣東五里直郡治之江  
樓山西北張氏有荔支異本合幹唐文若曲端  
常賦之焉

寰宇云涪州縣地頗產荔支其味尤勝嶺表相  
傳城西十五里有妃子園多荔支當太真時以

馬通馱載七日夜至京人馬多斃於路百姓苦之

晁說之詩荔支一騎紅塵後便有漁陽萬騎來  
謂此也然蜀中荔支瀘叙之品爲上涪州次之  
合州又次之涪州徒以妃子得名其實不如瀘  
叙耳

涪州圖經云州至長安有便路不七日可到昔  
宋景文作方物略言荔支生嘉戎等州以去長  
安差近疑卽爲妃所取蓋不知涪有妃子園又



自有便路也

按蜀志補云高都山在梁山縣北山中民以種薑爲業有古驛路乃天寶貢荔支所經也

郡國志云樊在施夷中最賢古所謂樊噲之冢多以荔支爲業園植萬株歲收百五十斛

敘州圖經云荔支廳卽倅廳有名萬朶紅最爲佳品又一本在尉廳一株四柯西南一柯獨肉

厚而味甘又天峯巖在宜賓西百里山坡荔支

連表多屬廖氏宋時此州因出荔支煎

蜀中方物記

惠州荔枝味酸樹亦甚少東坡曾云土產早者  
既酸且少而增城晚者不至方有空寓嶺表之  
嘆至東莞漸多漸佳五羊黑葉諸品遂與閩產  
伯仲耳

徐勣客惠記聞

廣西荔枝色青大如楊梅肉薄核大味甘而不  
酸如閩龍眼之下者龍眼則又不逮矣

謝肇淛

百粵風土記

元李京雲南志土獠蠻以採荔枝販賣爲業則  
滇南亦有荔枝也然蚤摘味酸殊不堪嚼余友

鄧汝高視滇學時黔國以餉子道協所嘗啖者  
或以爲採荔之枝誤矣

黃明立千頃齋集

周彥通云昔嘗讀蒙泉翁論著曰荔支流品僅  
可與北之蒲萄比南人不以爲然蓋護短也噫  
翁之意微矣夫荔爲果以實重陰不與焉紅繪  
紫綃龍牙鳳爪之夸詡先後篇牘雖東坡老人  
於流離遷謫之際猶以日啖三百顆爲言若不  
知其詞之饒焉噫美則美矣亦南方植物之珍

耳一騎紅塵萬姓播越千載而下非但人病之  
荔亦自病之矣翁甫守也安知其意不出於此  
哉長柯密葉敷蔭席地日交之而翠陰成月交  
之而金影碎風雪交之不疎不凋荔之陰蓋與  
徂之松建之榕吳楚之豫章同德而比義者也  
北人不及知南人有之而不必盡知也

馬宣荔陰說

荔支園已興

吳人胡百能爲李平叔言其族居姑蘇有名園

當春時縱人遊賞至三月朔暮芍藥盛開天氣  
清和士女羣集叔偶獨行散步至園角小亭最  
居幽處遙聞其上笑語驩洽就視之見供帳甚  
齊數黃衣少年共伙侍女六七人顏色殊艷亟  
趨避之旣去百餘步竊意黃衣非士庶所服回  
望之已無所覩但得荔支殼十數枚其大如鵝  
卵芬香觸鼻袖之以歸見之非世間物也

嶺南荔支固不逮閩蜀然銀每年荔支熟時設

宴名曰紅雲宴

清異錄

石桃山多中冠夏月坐其下香霧噴人顏色特  
妙秋冬以後霜葉脫盡巋然青出故中冠之色  
之香之味之骨有名姝國士所不兼者余每賞  
一詩義必曰此文中中冠也

蔣德璟雜說

嶺南荔支龍眼皆早熟雷署前龍眼一株十二  
月開花正月結子余初夏出門實已離離如指  
尖大初六日過陽江荔已熟微側而酸是火山  
種初十日方入夏猶春候耳驟啖頗損側生聲  
價然家君云雷種甚大而美未可以初出定品

題也

荔枝紀

李 煜

荔枝一作離支閩中惟興化泉州最盛他郡蒔之終不莫實種亦不一端午前熟者曰菓山味酸能洩胃氣宦遊渴荔枝名不曉也一見便啖每暴下遂致忍饒最上惟狀元紅進貢紫二種狀元紅以莆產爲勝進貢紫最耐久泉中錦田產無踰矣皆夏老方熟亦不多得民間鬻者曰蚤紅雖甜不貴也焙乾作行貨者桂林野種似

粵本楓亭有狀元紅亦可作乾然走味多矣秋  
深結子與龍目相見者曰筆香曰麻餅曰綠羅  
袍俱絕佳俗尤珍之如少年叢中丈人行也予  
鄉傅嵇勳夏器休官時四壁蕭然家錦田菴進  
貢紫數十畝至今繁茂子孫資之昔人木奴千  
頭可以不貧者信然予嘗以語新都鮑在齊在  
齊云著名艷譜擅珍綺筵不如爲清白吏作供  
一時傳爲佳話

荔支夢

鮑山



丁卯仲冬與友人擁爐夜坐因食蜜羅柑論及  
收藏果品之法某果某藏法某果某藏法荔支  
以礬水鹽水藏法子曰總失其原味恐未盡善  
也更闌客去就寢卽夢一人來訪蒼赤之顏蒼  
赤之服云吾乃荔僊因公不知吾族故特來相  
聞如狀元紅進貢紫桂林野種閩廣俱有之若  
廣則另有金鍾鴨蛋紅茭實鷄肫之類閩則另  
有鼻香金盞銀盤秋來嬌鷄抱子蚤紅果山之  
類味雖高下然丰格則一吾種安肯夷衆果之

列請公思之吾譜之外誰譜也但笑公不來我  
地何得真味今帶有數枚乾者公試嘗之較市  
貨輩自別公必欲鮮者容吾出支時再來相約  
遂醒口中猶有荔香

憶荔支

嚴佳明

余髮始覆額先君挈余宦于莆莆饒荔支出風  
亭者其上品也余有句曰曉霞藏葉底晚日隱  
林梢先君見而笑曰二語雖有致而失譌於詠  
物矣吾以驛騎送兒于樹下當更得佳句弗徒

辱吾珍果也遂疾鞭而去未至里許香風觸處  
火色薰灼離離若若搖曳空中枝葉反居其內  
耳始知二語之誤因婆娑賞啖日暮迺還復改  
句曰山氣蒸霞亂林香拂水來青絲歸騎籠盡  
帶火珠回今緬懷此事已三紀餘矣風木徒悲  
再遊無日偶道協言及荔支不覺淒然再賦一  
絕

曾化爲蝴蝶留連萬顆珍  
閩山魂夢在猶得憶  
前身

惠州府治旁有文惠堂宋陳文惠公堯佐守郡  
日堂前手植荔枝名將軍樹東坡有謝贊之今  
堂廢而荔枝無存

客惠紀開

交州記龍眼樹高五六丈似荔枝而小廣州記  
曰子似荔枝而圓七月熟以荔枝過始熟故名  
荔枝奴

廉州龍眼質味殊絕可敵荔枝坡詩云龍眼與  
荔枝異出同父祖端如柑與橘未易相可否異  
哉西海濱琪樹羅玄圃纍纍似桃李一一流膏

乳坐疑星殞空又恐珠還浦國經未嘗說玉食  
遠莫數獨使皴皮生弄色映珊瑚蠻荒非汝辱  
幸免妃子污

杜牧華清宮一詩尤膾炙人口據唐記明皇帝  
以十月幸驪山至春卽還宮是未嘗六月在驪  
山也荔支盛暑方熟詞意雖美而失事實

詩話

總龜

楊用修云白傳荔支圖序可歌可咏可圖可畫  
歐陽公荔支詞絳紗囊裏水晶丸亦妙

晁氏曰皇朝蔡襄記建安荔支味之品第凡三十餘種古今故事一卷陳振孫曰君謨爲此書且書而刻之與牡丹記並行閩無佳石以板刊歲久地又濕皆蠹朽至今猶藏其家而字多不完可惜也

文獻通考

蔡端明荔支譜舊乃棗板所刻博古賞鑒家重之若木難火齊此本爲莆人翻鏤者亦不失筆意但搨不用墨而用煙殊乏光彩耳

徐燠缸雨

樓集

興化志古蹟宋軍治清心堂有太守徐師閔荔  
支譜刻于壁則蔡譜之外復有徐譜也又陳玉  
叔轄閩日有荔支考今覓之未得

廣州城西南有荔支灣漢昌華園故址廣四十  
里袤五十里黃榆詩云昌華苑外裙腰草玉液  
池邊鼓吹蛙卽此地

馬欽南粵概

崔倅宦廣州一乳媪善幻伎倅家小鬟福州人  
媪語鬟曰亦思歸乎我與汝同歸乃于浴房施  
小箕共立其上戒鬟謹閉目覺身飄飄行虛空

中開目見通衢市井人物廣城也遂造其家父母驚喜媪使紹之曰通判公幹泊舟河干我偷出當急還來春來訪我遂別去穿市覓土物數種復立箕上頃刻還舍以物分遺家人一日抱嬰兒門前見有持福荔者兒求之不得媪曰我別有計取小盒置几上發之則滿盒皆荔倅大駭異而鬟父母適至鬟詢以向日事皆合倅欲窮其術媪笑曰此神術官人試觀之拉詣其家酒坊坊有大釜煮酒正沸媪躍身其中遂不見



馬敘南粵概

元古杭徐昌綠荔亭記云叙南之西安邊里有  
銅山銅山巨族爲廖氏其先世徙自蜀郡詩書  
行誼爲鄉人所敬交遊婚媾率顯者也家有荔  
支兩株莫究所自植古老相傳約百數十年物  
其盤飢偃蹇凌霄漢蔽日月就下屬望之蒼然  
如垂天之雲傍有一亭夏暑燭爐實熟葉密香  
聞數里廖氏耆耄以其暇率族人聚樂其間布  
席列俎折實於盤少者以次奉觴爲壽畢則拱

侍聽長者之訓懽洽之至禮度不踰然世雖有  
荔支未有實綠而味甘者迨宋太史黃公食之  
驚異而有廖致平家綠荔支之句今尚見於豫  
章集中鄉里因名其亭曰綠荔廖君樞童稚時  
與予同學京師今皆將五十矣持譜求予爲斯  
亭記余見其歷世宦學相承治行尤著斯亭殆  
將有聞於遠哉廖之後世子孫其尚培而葺之  
於無窮可也按志亭在敘府西六十里徐爲中

善左丞

曹學佺蜀中方物記

方物略云隈枝生邛州山谷中樹高丈餘枝修  
弱花白實似荔支肉黃膚甘可食大若爵卵贊  
曰挺幹旣修結蔕滋白戟外澤中甘可以食魏  
鶴山萬州魯池觀荔支詩曰分隨猿鶴老隈枝  
超詔重來兩鬢絲邂逅一觴莫辭醉能禁二十  
載差池則荔支亦可以名隈支矣

曹學佺蜀中

方物記

余性嗜橘日啖百餘顆偶病文園之渴喫之立  
解竊謂百果之品橘爲第一閩州洞庭各擅其

美追督學閩中客有作荔支考者侈而誇之獨  
不及橘余爲之短氣因繪圖作評語以代置像  
評曰夫橘與荔支古今賦咏者夥矣其色朱實  
而丹苞其味甘醲而芬郁將無同乎然荔支熟  
在乘炎而橘也素質霜凝貞芳冬茂操不如也  
荔支鄙其患腐而橘也精白任道淑離有理德  
不如也荔支蒙誚側生而橘也光分璇宿榮植  
上林珍不如也荔支易損左車而橘也消飢解  
醒通神已疾益不如也由斯較之始信靈均爲

善頌王逸非知言客惡得嘲余爲昌歆羊棗之  
嗜乎哉

顧大典入閩遊稿

不佞黃蓬山莊有橘數樹覽足下圖評心馳故  
園矣不佞以爲灼灼麗日則美姬也耿耿凌霜  
則貞婦也節槩旣殊風韻迥別吾其在荔子乎  
雲夢多柚不敢私於鄉土江淮變枳不盡掩其  
瑕瑜近日蔡伯華職方取香櫟足下取橘而欲  
班荔支上不隨人妍媸者也不佞特爲側生解

嘲云爾

陳文燭荅顧道行柬

余家雲夢之側舊稱橘鄉余酷愛其花與實木  
奴數頭手自植之其意殆亦彷彿道行也已而  
遊蜀遊閩並得以荔支充盤餐而余之嗜更篤  
甚輒以噉蔗之境比之每一入齒頰則灑然不  
知蜀道之難瘴海之遠也乃知櫨梨橘柚各有  
其美大都非其至者耳道行評橘謂當出荔支  
右其詞甚辯而里人陳玉叔駁之余與二君同  
臭味何能獨附玉叔口吻第道其自所嘗試者  
乃爾儻亦風味故自有別乎然世人嗜荔子者

什九嗜橘者什一道行心遠必自有寄當不在  
區區品第間哉

張文耀荔枝評題辭

足下品龍眼伯仲荔枝鄙意亦然曾質之王敬  
美敬美曰直堪作奴耳客有以側生旁挺比王  
家兄弟者不佞爲次公方並駕何堪此語客遂  
不言異時與二王談及當共鼓掌耳

陳文燭荅

顧道行柬

荔枝自湖南界入桂林纔百餘里便有之亦未  
甚多昭平出檳核臨賀出綠色者尤勝自此而

南諸郡皆有之悉不宜乾肉薄味淺不及閩中

所產

桂海虞衡志

龍荔殼如小荔支肉味如龍眼木身葉亦相似  
二果故名可蒸食不可生啖令人發癩或見鬼  
物三月開小白花與荔支同時

桂海虞衡志

余深罷相居福州第中有荔支初實絕大而美  
名曰亮功紅亮功者深家御書閣名也靖康中  
深謫建昌軍旣行荔支不復實明年深歸荔支  
亦如故乃知世間富貴人皆有陰相之者

老學



庵筆記

予叅成鄒議幙攝事漢嘉一見荔子熟時凌雲  
山安樂園皆盛處糾曹何預元立法曹蔡迨肩  
吾皆佳士日相與同盤桓薛許昌亦嘗以成都  
幙府來攝郡未久罷去故其荔支詩曰歲杪監  
州曾見樹時新入座但聞名蓋恨不及時也每  
與二君誦之

老學庵筆記

宋福清翁昭文者先儒亢之從子也圃中非時  
生荔支其母曰豈有嘉客踵門耶頃之莆田林

光朝至因名爲嘉客紅子向脩荔支譜未載漫  
記於此 徐氏筆精

閩士越科臨川人赴詞會京師旗亭各舉鄉產  
閩士曰我土荔支真厭枝天子釘坐真人天下  
安有並駕者撫人不識荔支之未腊者故盛主  
梅梅閩士不忿遂成喧競旁有滑稽子徐爲一  
絕云閩香玉女含香雪吳美郎星駕火雲草木  
無情爭底事清明經對赤叅軍 清異錄

交趾有芭蕉極大隆冬不凋中抽一幹節節有

花花重則幹爲所墜結實下垂一穗數十枚長  
數寸去皮爛軟如熟柿可食一名牛蕉又有龍  
荔實如小荔支味如龍眼木與葉亦相似元陳  
剛中使安南詩云牛蕉垂似劍龍荔綴如珠紀  
其實也謝在杭百粵風土記載廣西荔支如龍  
眼豈卽交趾之種歟若芭蕉則閩廣極多第不  
如交南之大耳

徐氏筆精

儋耳荔支凡幾種產於瓊山徐聞者有曰進奉  
子核小而肉厚味甚佳土人摘食必以淡鹽湯

浸一宿則脂不粘手他種味帶酸核大肉薄稍不及也

顧盼海槎餘錄

荔枝子閩中爲上川蜀次之嶺南又次之味甘無毒蔡端明著荔枝譜通論興福漳泉四郡名家不過十有二品其下三十二品不論也有名桂林皮龐大如雞子味甜一名中冠皮光而薄味清甘一名金鐘皮略龐色青黃味佳大類桂林皆六月熟一名火山核大味甘酸四月先熟一名早紅類火山五月熟又有狀元紅一種形

圓味甚佳仙遊楓亭爲多時獨重之

慎懋官華

夷花木考

荔支酒方用荔支肉三斗燒酒餅麴一斤拌勻以大盆盛之發過對時又用大盆換盛發過對時依燒酒法蒸出酒埋地中兩日去火氣香美可愛

徐氏筆精

唐鮑防襄州人天寶末舉進士大曆中爲福建觀察使時明皇詔馬逋進南海荔支七日七夜達京師防作雜感詩云漢家海內承平久萬國

戎王皆稽首天馬常銜首  
蓓花胡人歲獻葡萄  
酒五月荔支初破顏  
朝離象郡夕函關  
雁飛不到桂陽嶺  
馬走皆從林邑山  
甘泉御果垂仙閣  
日暮無人香自落  
遠物皆重近皆輕  
雞雖有德不如鶴  
日擊時艱一念忠  
慊可見是知貴妃所  
食荔支實出南海  
已見劉昫唐書并防  
詩蔡君謨譜謂愛嗜  
涪州歲命驛致羅景  
綸以爲一騎紅塵  
乃瀘戎之產恐悞矣

徐氏筆情

烏石山有宿猿洞怪石森聳昔有老翁畜一猿

每夜輒宿洞中唐季大築城垣隔此洞於城外  
宋熙寧中湛郎中俞棄官歸隱於此程大卿師  
孟篆書宿猿洞三字於石徑尺許洞前舊有荔  
支樹極佳名曰洞中紅古靈陳襄贈湛俞詩云  
此去蓬萊峰頂月夢魂應到荔支園羅源林迥  
詩云荔支影裏安吟榻茵茵香中繫釣舟迨及  
國朝廢爲叢塚荔樹已無存矣謝肇淛有句云  
湛侯當年拂衣歸卜築喜就城南陲茵茵香風  
垂釣裏荔支寒影對僧時予亦有詩云怪石高

於雉蝶齊昔人曾此卜幽棲白楊滿地髑髏出  
蒼蘚上崖名姓迷夜雨徒聞山鬼哭秋風不見  
野猿啼荔支樹死洞門塞行到此中生慘悽壁  
上諸名公題刻具存無人修復良可慨也

徐氏

榕城三山志

余家有徐虞部荔支譜碑本虞部名師閔字聖  
徙嘉祐中守莆其譜文字極簡質至于品量荔  
子高下美惡皆不錯但爲蔡譜所掩世未有知  
之者然公荅虞部書稱其精密又云常亦有作



大略相近餘亦少有異焉殊無以已長蓋它人  
之意此其所以爲公也

劉後村文集

荔支珍果楊妃絕色一時相值宜唐帝醉心太  
真厄於祿山宋樹剗於黃巢均之不幸第太真  
身死而名終辱宋樹暫而品猶奇妃也千載  
而下視宋樹不有餘愧者乎

趙世顯芝園隨筆

閩中荔支通譜卷十